

Al Cav^o Avellino
in segno di venerazione,
senza l'autore



DE
GERMANICO-TRIPTOLEMO

IN PATERA AQUILEIENSI CAELATO.

SCRIPSIT

CAROLUS ODOFREDUS MÜLLER.

CUM TABULA AERI INCISA.



ESTRATTO DAGLI ANNALI DELL'ISTITUTO DI CORRISPONDENZA
ARCHEOLOGICA VOL. XI, PAGG. 78-84.

Cum ante hos quinque annos Cæsa rei Musei quod Vindobonæ asservatur, admirabilia cimelia perlustrarem, maxime tenebat me opus cælatum, elegantissima Græcorum arte conspicuum, cuius et illo tempore diligentius examinandi et nunc, specie ab egregio artifice scite expressa, cum eruditis omnibus hominibus communicandi copiam mihi fecit viri illustrissimi, qui illis thesauris præfectus est, Comititis de Dietrichstein, insignis liberalitas.

Patera est Aquileiæ, ut narrabatur, reperta, ex argento egregio artificio cælata et auro (quod nunc quidem pæne evanuit) ita superinducta, ut vestimenta potissimum aliaque quædam insignia, humanis corporibus addita, eo exsplenderent: quam metalli colorum distinctionem antiquis admodum placuisse constat. Opere autem cælato, statim intuenti manifestum est, exhiberi Triptolemum Eleusine proficiscentem, ut Cereris dona cum omnibus terrarum populis communice: similiter ac in aliis antiquæ artis operibus, maxime vasculo picto, quod Poniatowskyi nomine distinguitur, expressus est. Summam anaglyphi partem obtinet Jovis fulmen gestantis dimidia species ex æthere eminens, qui quod caput velatum habet (1), id reconditam ejus et arcanam vim significare videtur, qua dirum illud inferorum et superiorum deorum certamen ad salutarem finem perduxerit. Medio quasi itinere inter terram et Olympum consederunt Ceres et Proserpina; Ceres ea veste induta et amicta qua assolet, magnam facem dextra tenens, ita formatam, ut sæpius in operibus romanorum temporum conspicitur (2), Proserpina seminudo corpore, spicea sarta capite manumque dextra gestans ita versus matrem inclinata eoque eam vultu intuens, ut carissimo ejus adpectu, tam diu desiderato, vix satiari posse illam appareat. Humero autem ejus deae innititur, quasi intima cum ea familiaritate conjuncta, mulier tenui tunica vestita, quæ vitta caput ambiente et redimiculis inde dependulis Hecaten, ut puto, se prodit (3), cuius auxilio Proserpina ex inferis ad olympios deos re-

(1) Copiose de ea re disputavit Ed. Gerhard, in *Prodromo* conjuncto cum *Antiquis monumentis* ab eo V. D. editis Cent. I, tab. 1. Pauca quædam exempla composui in *Compendio archæol.* §. 35o, 6.

(2) Velut in denario Memmiano et Pompeianis quibusdam picturis.

(3) Ἐκάτη λιπαροκρήδεμνος, *Hymn. Homeric.* in *Cerere* v. 25.

ducta est. Itaque hæc anaglyphi pars spectat ad Proserpinam matri et cælestium deorum consortio redditam. Sed in inferiori eiusdem operis cælati parte currus conspicitur duobus draconibus iunctus, quos duæ virgines nutriunt, Celei, ut videtur, filiæ, hic fere figuratæ ut in vasculo illo figlino superius memorato, cujus picturam Ennius Quirinus Viscontius insigni cura illustravit. Adstat medio loco vir juvenis quem Triptoleimum agere apparet, laurea cinctus (1) et pallio græcanico amictus, qui in eo est, ut ture ex acerra sumpto aram adoleat. Circumstant eam aram, in qua Proserpinæ raptus subtilissimo opere expressus est, puer camillus, puella calathum sublatum capite portans, alterius denique pueri figura minus conspicua. Pone eas virgines quæ draconibus alendis mulcendisve operam dant, arbor attollitur, quæ non dubito quin illam oleam referat ex trunco revirescentem, cuius sub umbra Ceres apud Eleusinos primum requievisse ferebatur. Infimo denique loco Terra mater nudis mamillis, ut fingi solet, et cum bove, agriculturæ ministro, in solo cubans conspicitur (2).

Descripsimus, quæ oculis antiquæ artis operibus aliquantulum assuetis statim se offerunt: sed supersunt quædam paullo curiosius illustrando. Non dico celebratissimam Triptolemi fabulam: siquidem in origines atque primigeniam fabularum naturam in unoquoque sculpto pictove opere inquirere, nec refert nec iuvat. Sed qui huic potissimum toreumati proprius et peculiaris, et ut diligentius exploretur dignissimus esse videtur, eius viri habitus est quem Triptoleimum agere dicebamus. Non enim esse eum Triptoleimum, eius viri vultus, habitus, cultus demonstrant, omnia ab Eleusinio illo heroe alienissima, quæ non ipsum Triptoleimum, sed insignem quendam virum Triptolemi nomine cultum et celebratum hac specie proponi manifestissime produnt. Ac Germanicum, Drusi filium, significari et mihi, cum pateram conspicerem, visum est, et aliis viris antiquæ artis peritis placuisse comperi (3): quippe cuius et statura membrorumque symmetria, et facies oris, quantum in exiguo toreumatis ambitu dignosci potest et ipse pallii amictiendi mos, simillima deprehenduntur in aliis artis antiquæ operibus, velut in eo signo marinoreo, quod in parietinis basilicæ Gabinæ inventum in Parisiensi museo asservatur (4). Accedit alte-

(1) Hanc cum ipsum vasculum intuerer, agnovisse me puto: sed in lineis, quibus artifex diligentissimis id adumbravit, vix eam conspici posse, non diffiteor.

(2) Ἐν σκιῇ, αὐτὰρ ὑπερθε πέφυκε δάμνος ἑλαινῆς, Hymn. Homer. in Cerer. v. 100.

(3) Nisi memoria fallor, Arnethius V. Cl. sic sibi videri mihi significavit.

(4) Musée royal. n. 141. Mongez, Iconographie romaine pl. 34, n. 3.

rum eiusdem plane generis monumentum, iam diu notum illud et celebratum: gemma ectypa, quam nunc dicunt *cameam*, ex onyche præclaro artificio scalpita, quæ in cimeliis Regis Francogallorum cum regia bibliotheca coniunctis servatur (1). Conspicitur in ea currus magnifice ornatus et duobus draconibus iunctus; quo iumentorum genere Triptolemus uti solet. Huic insistit vir iuvenis militari Romanorum habitu conspicuus, ex sinu vestis de collo pendulæ, quam læva attollit, dextra semina promens eo plane gestu quo Triptolemus fingitur. Adstat mulier papavera et spicas, Cerealia munera, præ se ferens et altera manu volumen libri tenens, qua Cererem legiferam sive thesmophoron significari, vix in dubium vocari potest. Hanc pompam cum superioris ætatis sancta simplicitas Iosephi Patriarchæ triumphum appellasset: iam dudum a viris antiquitatis gnaris Germanicus, Drusi filius, in iuvene illo agnitus est: ac si de similitudine eius voltus ab artifice expressa dubitari liceret, Agrippinam tamen, eius conjugem in Cerere illa liquido apparere, testes affirmant gravissimi (2).

Quæ cum ita sint, quæri debet, qui factum sit, ut antiqui artifices Germanicum, virum militari maxima laude illustrem, Triptolemi cuius omnis fabula ad agriculturam spectat, imagine potius nobilitare studuerint, quam Martis vel ex heroibus eorum potissimum, qui feroces extremi orbis nationes débèllavisse ferebantur. Ac Græcos quidem constat, Germanici humanitatem et benevolentiam, eiusque animum optimis quibusque artibus eruditum, et mores liberales et vere civiles omni laudum genere celebrasse, et Athenienses maxime, ut Taciti (3) verbis utar, quæsitissimis eum honoribus exceperisse, vetera suorum facta dictaque præferentes: sed quibus argumentis id efficere potuerint, ut Eleusinio suo heroi æquipararent Germanicum, haud assequor (4). Et Lesbios, tituli marmori inscripti testantur, Agrippinam *Θεᾶς Αἰολίδος καρποφόρου* nomine celebrasse: Germanicum autem Triptolemu dictum esse, neque Lesbiorum, neque alius cuiusquam Græcorum populi monumenta significant. Sed omnis, puto, eius quæstionis difficultas expeditur, si statuerimus Antiochenis arti-

(1) Edidit eam delineatam in publicum et diligenter descripsit Oudinet in Historia Academiæ inscript. et elegant. literar. Francogall. T. I, p. 278. Montfaucon, Antiquité expliquée, Supplem. T. III, pl. 7. Millin, Galerie mythologique tab. 48, n. 220. Mongez, Iconographie romaine pl. 24*, 3.

(2) Oudinet eam explicationem prioribus acceptam refert, illi Mongez T. II. p. 135.

(3) Tacit. Ann. II, 53.

(4) Ex his tamen Atheniensium adulationibus Mongez sculpture illius argumentum depromptum esse putat.

ficibus eam imaginem inventam, sive, ut rectius dicam, ab ipsa Antiochensi civitate eos honores primum in Germanicum collatos esse, id est, ab ea civitate, quæ et Triptolemum conditorem coleret et, si Germanicum novum conditorem sibi fore prædicaret, neque inepte neque improbabilius ei adlaretur. Enimvero Germanicus, cum Orienti a Tiberio præfectus post longa itinera per Græciam, Asiam, Armeniam, Syriam Euphratensem, Ægyptum facta, una cum Agrippina uxore Antiochiam peteret (ubi Pisonis per insidias mox tristissima ei mors obeunda erat): Antiochensium civitati alter Triptolemus videri debebat, qui urbi, cuius ille primordia auspicatus fuerat, novum sæculorum ordinem et felicia tempora allaturus esset: præsertim si etiam Antiochiæ, quod Alexandriæ fecit (1), apertis horreis publicis pretia frugum levaverat, et, ut in his terris ubique solebat, græcum amictum græcosque mores et religiones affectabat.

Quod autem dixi, Triptolemum ab Antiochensibus conditorem civitatis suæ, scilicet Seleuco Nicatore multo antiquioris, habitum esse, id quale fuerit et quibus de causis factum, operæ pretium videtur paucis explicare. Iisdem locis, quibus Seleucus magnam illam Antiochiam condidit, jam multis ante sæculis, ut videtur, pagus fuerat *Ionæ* sive *Iopolis*, situs in eo colle, qui *Silpius mons* dicebatur, in quo postea arx Antiochensium extracta est (2). Huc, Antiocheni ferebant, *Ionem* illam *Argivam*, *Inachi* filiam a *Jove* amatam, cum ex Ægypto fugata esset, pervenisse atque ibidem diem obiisse extremum, deinde ab *Inacho* *Triptolemum Eleusinium* atque *Argivos* nonnullos missos esse, qui filiam amissam quærerent, eosque *Iopolin* illam cum *Saturni* delubro condidisse atque ab ipsis *Syris* dictos esse *Ionitas* (3). Ne quis miretur, quod *Triptolemus* cum *Argivis* conjungitur et ab *Inacho* *Argivo* in *Orientem* missus esse fertur: ii qui eam fabulam fin-

(1) Tacit. Ann. II, 59.

(2) V. Malelas chronogr. p. 29, 37, ed. Bonn. (qui scriptor in aliis rebus levissimus in rebus Antiochensium præstantissimos sequitur auctores) et Libanius Antioch. p. 288-289, ed. Reiske. Cf. etiam Stephanus Byz. v. *Ἰώνη*, Suidas v. *Ἰώπολις*, Eustath. in Dionys. Perieg. v. 918, p. 281, ed. Bernhardt.

(3) Hæc ex *Mela* p. 28-29, et *Chronico Paschali* p. 41-42, ed. Paris. Eadem brevius *Cedrenus* p. 21. Par. Similia *Libanius* p. 287 sqq., nisi quod *Ionem* ipsam huc pervenisse ignorat. *Strabo* XVI, p. 750, fabulam de *Triptolemo* ad *Ionem* quærendam misso commemorat, *Triptolemi*que posteros inter *Antiochenses* esse tradit, illique heroi in *Casio monte* sacrificare et feriari solitos esse *Antiochenses* narrat. Cf. *Rad. Rochettus*, Hist. colon. græc. I, p. 251: qui vir doctissimus verique inveniendi cupidissimus nunc puto aliter de hoc fabularum genere censet atque olim.

ixerunt, noverant sine dubio, etiam Argivos Triptolemmum sibi vindicasse, et a Trochilo genitum tradidisse, qui Argis Eleusinem venisset (1). Quod autem Ionem Inachi filiam in agrum Antiochensem venisse ferebant, huius rei nullum asferre poterant argumentum nisi nomen illius pagi, qui Ione sive Iopolis dicebatur: quod quidem nomen, cum Syriæ pagum designaret, a Syris non a Græcis ab origine habitatum, e nulla sane lingua repeti potest, nisi Syriaca. Syros enim homines cum pagum habitasse, eo minus in dubitationem vocare licet, quod etiam iis temporibus quibus Antiochia in Orontis ripa a Græcis Macedonibusque colebatur, pagi circumquaque siti Syriaca nomina Syrosque incolam syriaca lingua loquentes habebant (2). Accedebat, quod certo quodam anni tempore hic ritus ab Antiochenis observabatur, ut fores pulsarentur et simul clamaretur: «Salvetur anima Ionis»: qui ritus, non dubito, quin ex antiquis Syriæ religionibus superfuerit, sed Græcam sive græcissantem formam induerit, ita ut pro Syrio numinis alicuius nomine Græcum illud substitueretur (3).

Etiam Triptolemmum, haud facile adducar ut credam, nullo plane prætexto et temeraria tantum quicquid placuisset fingendi libidine Antiochiam esse traductum, præsertim cum certa quædam inter Antiochenses gens esset, quæ se a Triptolemo ortam putaret illique heroi in Casio monte sacra faceret. Græcam tamen ex ipsa Attica coloniam temporibus fabulosis in illam Syriæ oram deductam esse, omnium difficillimum est ad credendum: etiamsi Eudocia Augusta, Theodosii minoris uxor, Atheniensis philosophi filia, Antiochensibus ambitiosa hac allocutione scite blandita est.

Ἐμπερίως γεγενης τε καὶ αἰματος εὐχομαι εἶναι (4).

(1) V. Paus. I, 14, 2, et cf. Lud. Preller de Cerere et Proserpina p. 300.

(2) Velut pagus Charandama prope Daphnen (Vita S. Marthæ in Actis Sanctorum Maii T. V, p. 409, 414), pagus Gandigora eiusdem tractus (ib. T. V, p. 415-416), pagus Ghisira in agro Antiocheno (Assemani Bibliotheca T. II, p. 323). Paganos circa Antiochiam etiamtum Syriaca lingua usos esse, testatur Io. Chrysostomus, Homil. 19, 1, T. II, p. 189. a. de Sanct. martyr. I, p. 651. a. ed. Montfaucon.

(3) Ἰὼς ψυχῇ σωζέσθω, clamatum esse narrat Malelas p. 29. Similia Libanius p. 289.

(4) V. Euagrius, Hist. eccles. I, 20, cum Nicephoro XIV, 50. - Nicbuhrium (in Museo suo rhenano T. III, fasc. I, p. 40. Cf. Opusc. min. p. 204), his de Triptolemo fabellis nimium pretium statuuisse, ac mythos cupidius in historias convertisse, recte monuit Prellerus de Cer. et Proserp. p. 301. Sed hic V. D. ubi scribit, Triptolemi posteros e Gordyene, quæ in Assyria est, Antiochiam esse a Seleuco traductos, Strabone XVI, p. 760, non recte usus est.

Convenientius ad fabularum et sacrorum in antiquitate vicissitudines et mutationes opinabimur, indigenam quendam Asiæ Syriæve heroem, antiquitas apud Ionitas cultum, eo temporis quo Oriens magis magisque Græcis moribus et artibus assuescebat, in Triptolemum esse mutatum. Ac novimus quidem Lydum eiusmodi heroem, Tylum appellatum, cuius memoriam in his ipsis Annalibus (1) numo Sardiano collato cum Dionysii Halicarnassensis narratione instauravimus. In numo illo Triptolemi Attici ad instar draconibus vectus frugesque dispergens conspicitur; Dionysius autem eum Terra ortum tradit filiamque habuisse Halien. Nunc addere iuvat, eundem Tylum, nomine paululum immutato, in historiis Xanthi Lydi (si Xanthi erant, quæ eius nomine ab antiquis designantur) celebratum fuisse. Xanthus enim, ut Plinius ait (2), in primo historiarum libro tradiderat, occisum draconis catulum revocatum esse ad vitam a parente herba, quam balin nominat, eademque deinde Thylonem, quem draco occiderat, restitutum saluti. Eandem fabulam prolixa neque iniucunda narratione illustravit Nonnus, qui Tylum, Maonium, a serpente tradit interfectum, hunc vicissim a Damasene Gigante occisum, sed a dracæna in vitam restitutum esse admota vulnere herba, quam *Διὸς ἄνθος* dicit: quod cum vidisset Moria nymphe, Tyli soror, eadem illam herba usam esse ad Tylum in vitam revocandum (3). Hæc Nonnus, uberrimus ille et non dico inexhaustus, sed vix delibatus fons eius fabularum generis, quod hellenisticum dicere licet, id est orientali stirpe prognatum, sed Græcis formis excultum et expolitum (4). Si quis autem quærat, quæ necessitudo fuerit inter hunc Lydiæ heroem Syrosque Ionitas, verbo monendum, Lydorum religiones, quantum nobis innotuerunt, mixtas fuisse videri ex Phrygiis et Assyriis sive Syriis, quo factum est, ut idem Hercules Sandes sive Sandon, qui Lydorum fabulis celebratur, a Cilicibus, Antiochensium conterminis, splendidissimis sacris coleretur (5). Ac Phœnicium quendam Tri-

(1) Annal. T. II, p. 157.

(2) Plinius H. N. XXV, 2, 5, §. 14, ed. Sillig.

(3) V. Nonnus, Dionys. XXV, 451-551.

(4) Quocirca Nonni fabulas examinare et ad fontes suos caussasque revocare operæ pretium esset, iis potissimum, qui interiorem Orientis *ἑλληνίζοντες* cognitionem nobis comparare student. Plurimas fabulas Nonnus a Bithynis ad Sangarium, ubi Nicæa ad Ascanium lacum sita erat, et a Bybliis et Berytiis (quorum urbem nomine Berôes celebrat) excepisse videtur.

(5) Scriptoribus, quorum de Sande sive Sandone narrationes composui et explicui in Niebuhrii Museo rhenano T. III, p. 22 sqq., nunc adiicio Nonnum, qui in Dionys. XXXIV, 191: *Κιλίκων ἐνὶ γαίῃ, αἰτ, Σάνδης Ἡρακλῆς κικλήσκειται εἰσέτι Μορβέως*.


ptolemum etiam gemma scalpta, quæ a possessore Demidoffiana dicitur (1), proponi conjicio, siquidem iuvenis ille chlamyde amictus, sinistra spicas tenens, dextra uvis, ut videtur, oblati duos serpentes pascens, Triptolemo nescio similiorne sit an dissimilior: quam ambiguum speciem si cum Phœniciis literis in eadem gemma cælatis componimus, eo adducimur, ut Asianum heroem in græcam Triptolemi formam mutatum agnoscere nobis videamur.

Sed hoc disputandi argumentum, verendum est, ne in nimis effusos et longinquos campos nos abducatur: satis habebimus, si hæc in re assensum aliorum VV. DD. obtinuerimus, quod nulla in orbe terrarum civitas Germanicum meliore iure et splendidiore prætexto Triptolemi nomine colere et celebrare potuerit quam Antiochenses.

Gottingæ, decembri mense a. MDCCCXXXIII.

(1) V. Institut. Archæol. *Exposition gemmarum* (Impronte gemmarie), Cent. II, n. 37. Gesenius scripturæ linguæque phœnic. monum. p. 222, tab. 28, n. LXVII ter.

VA1
1542885



—

—